

# INUIT ATAQATIGIIT INATSISARTUNI



27-09-2023

UKA2023/Imm. 29

Mikivsuk Thomassen

## **Uunga siunnersuut:**

**Uunga siunnersuut Meeqqat tapersorsorneqartarnerat pillugu Inatsisartut inatsisaani inatsisip allangortinneqarnissaa pillugu inatsisissatut siunnersuut (Meeqqanut aamma ilaqtariit illuini ataatsimoorussamik digitalikkut sullissinermi isumaginninnermut Aqutsisoqarfimmiit ersarissaaneq il. il.)**

## **Meeqqanut, Inuusuttunut Ilaqtariinnullu Naalakkersuisoq**

### **Oqaaseqaat:**

Meeqqat tapersorsorneqarnissaannut Inatsisartut inatsisaat allangortinneqarnissaa pillugu Naalakkersuisut siunnersuutaannut Inuit Ataqatigiit sinnerlugit qutsavigerusuppakka.

Ataatsimut isigalugu allanguutissatut siunnersuutit 12-it peqarput.

Ilaatigut pineqarlutik kommunalbestyrelsep pisussaaffiinik ersarissaasoqarnissaanut tunngasut, Isumaginninnermut Aqutsisoqarfiup kommunini sulianik suliarinnittarnermi qanoq ikiuussinnaanerinut ersarissaasoqarnissaanut tunngasut, meeqqat pillugit sulianik suliarinnittarnernik digitaliseriinnermut tunngavissaq pillugu, kiisalu meeqqanut ilaqtariinnullu sullissivinnik - ilaqtariillu illutaannik pilersitsinissamut aqutsinissamullu inatsimmik tunngavissaq aamma aalajangersarniarneqarluni.

# INUIT ATAQATIGIIT INATSISARTUNI



Taakkulu saniatigut aamma nuannaarutissaavoq meeqqat eqqartuussiviup aalajangiinerata kingunerisaanik ulloq unnuarlu paaqqinnittarfimmut inissinneqarsimasut eqqarsaatigalugit maanna angajoqqaaminnik - isumassuisunilluunniit – tikeraarneqarsinnaalernissaat aalajangersarneqarluni ammaanniarneqalermat.

Meeqqat angerlarsimaffiup avataanut inissinneqartartut tusarneqartarnissaat pingaaruteqarluinnarpoq. Meeqqanik illersuisartup meeraq qanoq isumaqarnerminik ikiortussaavaa minnerunngitsumillu meeqqap pisinnaatitaaffiisa eqqortinneqarnerisa qulakkeerneqarnissaannut peqataasinnaalluni. Taamaattumillu Inuit Ataqatigiinniit nuannaarutigeqaarput meeqqat angerlarsimaffiup avataanut inissinneqartut meeqqat illersuisuannik pinngitsooratic neqeroorfigineqartalernissaat aalajangersarniarneqarmat.

Siunnersuutit ilaattut erseqqissarniarneqarportaaq kommunabestyrelsip meeqqap angerlarsimaffiup avataanut inissinneqarnissaanut aalajangiisimatilluni utaqqiisaasumik ulloq unnuarlu paaqqinniffimmi inissalernissami tungaanut inissiivissamik pissarsinissamut akisussaasuusoq.

Kommunini meeqqat pillugit sulianik suliaqartarnermut IT-kkut ataatsimoorussamik aaqqissuussamik pilersitsisoqarnikuuvoq, taamaasilluta nunatsinni meeqqat pillugit sulianik suliarinnittarnerit tamaasa siunissami digitalisererneqartarnissaat piumasaqaataalissooq. Kommunit ingerlatsiviini meeqqanut suliassa qarfinni suliat tamarmik IT-kkut aaqqissuussamik ingerlanneqartalernerisigut kommunini tamaginni sulianik sullissisarnerup assigiiaarnerusumik ingerlanneqartalissaaq. Taamaasillutik kommunini kommunillu akornanni meeqqat pillugit suliat eqqarsaatigalugit toqqaannarnerusumik avitseqatigiissinnaalernissaat pitsaanerulissangatinneqarpoq – assersuutigalugu ilaqutariit kommunimiit

# INUIT ATAQATIGIIT INATSIARTUNI



kommunimut nuussimagunik paasissutissat pineqartut tigussaannerusumik pissarsiarineqarsinnaalissapput. IT-kkut aaqqissuussamik sullissisarnerup nukittorsarnerisigut meeqqat pillugit suliat pillugit paasissutissat ataavaannerusumik tigussaannerusumillu aammattaaq pissarsiarineqarsinnaalissapput. Tamannalu ilaatigut Inatsisartut Ombudsmandiatanut, Isumaginninnermi Naammagittaalliuteqartarfimmut, Meeqqat Illersuisuannut kiisalu Nakkutilliinermut aqutsiveqarfimmut paasissutissanik pissarsisarnissaannut eqaannerusumik aaqqissuunneqarsinnaalissalluni.

Inatsisitigut maanna kommunini tamaginni meeqqanut ilaqutariinnullu sullissivinnut, ilaqutariillu illuinut aalajangersakkanik eqqussisoqarnissaa siunnersuutigineqarpoq. Tamanna isumaqarpugut pitsaasuusooq – ukiunilu kingullerni anguniagaasooq maanna piviusunngortinniarneqalermat Inuit Ataqatigiinniit nuannaarutigaarput. Inuit Ataqatigiinniit pingaartipparput Meeqqanut ilaqutariinnullu sullissivinnut, ilaqutariillu illuinut tunngatillugu aaqqissuussineq kommunit qanoq taakkununga ingerlatsisoqarnissaannik kissaataat pingaartinneqarluni aalajangersarniarneqassasooq – matumunngalu pineqartut pillugit neqeroorutigisinnaasai allallu eqqarsaatigalugit. Namminermi ilaqutariinnut sullissiviit ingerlanneqarnerannut erseqqinnerusumik sinaakkuteqartitsinissamut tunngatillugu aalajangersaasoqarnissaa tapersorsorparput. Taamaattorli Naalakkersuisut kajumissaarusuppugut ilaqutariinni sullissiviit assigisaalu pillugit neqeroorutit ingerlaannarnissaat qulakkeerumallugu tigussaannerusumik pilersaarusoqqullugit kommunit peqatigalugit. Neqeroorutit ilaqutariit sullissiviisa illuisalu tunniussinnaasat ineriartorteqqinneqarnissaat pingaartipparput – taassumunngalu sulit tigussaannerusumik pilersaarusiortoqarnissaa amigaataasutut isumaqarfialugit. Nalunngisatsitummi aamma – pingaartumillu inoqarfinni minnerusuni neqeroorutit tunniunneqarsinnaasut killeqartorujussuupput –

# INUIT ATAQATIGIIT INATSIARTUNI



tamakkulu pillugit aaqqiagiisoqarnissaa pisariaqarluinnarpoq.

Naggataatigut Inuit Ataqatigiinniit Naalakkersuisunut oqariartuutigissavarput tusarniaanermi oqaaseqaatit malillugit Avannaata kommuunia kommunip ikiorneqarnissamik pisariaqartitsilluni Naalakkersuisunut noqqaasimanagera pillugu suliap qanoq killiffeqarnera ataatsimiitsitaliamut Naalakkersuisut nassuiaateqarnissaannik kissaateqaratta.

Taama oqaaseqarluta Inuit Ataqatigiinnit allannguutissatut siunnersuutit ataatsimiitsitaliami susasaqartumi suliassanngortinneqarnissaat inassutigaarput.